


Ni Presidente Thomas S. Monson



Dagiti Propeta a Mangiwanwan Kadatayo

Sumagmamano a tawen ti napalabas, nagtugtugawak iti siled ti Salt Lake Temple a pagmimiting ti Umuna a Panguluen ken ti Korum dagiti Sangapulo-ket-dua nga Apostol iti maminsan ti makalawas. Minatmat tak ti diding a sumango iti Umuna a Panguluen, ket idiy a napaliwko dagiti ladawan ti tunggal Presidente ti Simbaan.

Iti panangmatmatko kadakuada, dagiti immun-una kaniak—manipud ken ni Propeta Joseph Smith (1805–44) agingga ken ni Gordon B. Hinckley (1910–2008)—napanunotko, “Dakkel ti panagyamanko iti panangiwanwan ti tunggal maysa.”

Dagitoy dagiti naindaklan a lallaki a di pulos nagduadua, di pulos nagpangngadua, ken di pulos naupay. Dagitoy dagiti tattao ti Dios. Kabayatan ti panangpampanunotko maipapan kadagiti propeta iti agdama nga aldaw a naam-ammok ken inay-ayat, nalagipko dagiti panagbiagda, dagiti nasayaat a kababalinda, ken dagiti naparegta a pannursuroda.

Ni Presidente Heber J. Grant (1856–1945) ti Presidente ti Simbaan idi mayanakak. Kabayatan ti panangutobko iti biag ken dagiti pannursurona, mamatiak a ti kababalin a kanyon nga impagwadan ni Presidente Grant ket ti panagpursigi—panagpursigi kadagiti banag a nasayaat ken natakneng.

Ni Presidente George Albert Smith (1870–1951) ti President ti Simbaan iti panawen a panagserbik a kas maysa a bishop iti wardko iti Salt Lake City. Napaliwna nga adda dakkel a panagbalubal a maar-aramid iti nagbaetan ti Apo ken ti kabusor. “No agtalinaedka iti abay ti Apo iti linia,”

insurona, “addaka iti impluensiana ken awanto ti tarigaymo nga agaramid iti biddut.”¹

Inaawagannak nga agserbi kas maysa a miembro ti Korum dagiti Sangapulo-ket-dua idi 1963 ni Presidente David O. McKay (1873–1970). Insurona ti pannakaibilang dagiti dadduma babaen ti wagas a panagbiagna. “Ti Pudno a Kristiano,” kinunana, “ket ayat nga adda aramidna.”²

Ni Presidente Joseph Fielding Smith (1876–1972), maysa kadagiti kalaingan a managpartuat a mannurat ti Simbaan, ket addaan iti pangiwawan a prinsipio iti biagna iti panagadalna iti ebanghelio. Agbasbasa kadagiti nasantuan a kasuratan nga awan sardayna ken ammona dagiti pannursuro ken doktrina a masarakan kadagiti panid dagitoy kas iti asino man a naam-ammokon.

Ni Presidente Harold B. Lee (1899–1973) ket nagserbi a kas stake presidentko idi ubingak. Paggugustona a pagsasao ti “Agtakderkayo kadagiti nasantuan a lugar, ket di aggaraw.”³ Pinaregtana dagiti Santo nga agbalinda a mannakitunos, ken managdengngeg, kadagiti arasaas ti Espiritu Santo.

Mamatiak iti pangiwawan a prinsipio iti biag ni Presidente Spencer W. Kimball (1895–1985) ket dedikasion. Naan-anay nga indatonna ti bagina iti Apo. Indatonna ti bagina iti panagbiag iti ebanghelio.

Idi nagbalin a Presidente ti Simbaan ni Presidente Ezra Taft Benson (1899–1994), inawagannak nga agserbi a kas Maikadua a Mammagbagana iti Umuna a Panguluen. Ayat ti pangiwawan a prinsipiona, a naikabil iti paggugustona nga

adaw, nga insao ti Mangisalakán: “Ania a kita ti tao ti nasken a pagbalinanyo? Pudno kunak kadakayo, kas kaniak.”⁴

Ni Presidente Howard W. Hunter (1907–95) ti maysa a kanayon a mangkita iti pagsayaatan dagiti dadduma. Isu ket kanayon a managdayaw; kanayon a napakumbaba. Pribilehiok ti nagserbi a kas Maikadua a Mammagbagana.

Insuronatayo ni Presidente Gordon B. Hinckley nga aramidentayo amin a kabaelantayo. Insawangna ti nabileg a pammaneknekna maipapan ti Mangisalakán ken ti mision-na. Sinuruannatayo nga agayat. Ti panagserbik a kas Umuna a Mammagbagana ket pammadayaw ken bendision kaniak.

Ibaon ti Mangisalakán dagiti propeta gapu ta ay-ayatennatayo. Kabayatan ti sapsap a komperensia iti daytoy nga Oktubre, addanto manen pribilehio dagiti General Authority a mangibinglay iti balikasda. Padaanantayo daytoy a pagrebbengan nga addaan iti dakkel a kinapasnek ken kinapakumbaba.

Naparaburantayo iti kaadda ti naisubli a Simbaan ni Jesucristo iti daga ken nabangon ti Simbaan iti bato ti paltiing. Ti agtultuloy a paltiing ti mismo a pudno a kaipapanan ti ebanghelio ni Jesucristo.

Makapagsaganatayo koma nga umawat iti personal a paltiing a naruay a sumangbay kabayatan ti sapsap a komperensia. Mapno koma dagiti puspusotayo iti nau-neg a determinasion bayat ti panangingatotayo kadagiti imatayo a mangkanunong kadagiti sibibiag a propeta ken apostol. Malawlawagan, maparegta, maliwliwa, ken mapapigsatayo koma kabayatan ti idedengngegtayo kadagiti mensaheda. Ken makapagsaganatayo koma a mangikumit manen iti bagbagitayo ken ni Apo Jesucristo—ti ebangheliona ken ti aramidna—ket agbiagtayo nga addaan iti napabaro a pangngeddeng iti panangtungpal kadagiti bilina ken panangipatungpal iti pagayatanna.

DAGITI NAGADAWAN

1. *Teachings of Presidents of the Church: George Albert Smith* (2011), 191.
2. *Teachings of Presidents of the Church: David O. McKay* (2003), 181.
3. Doktrina ken Katulagan 87:8.
4. 3 Nephi 27:27.

PANANGISURO MANIPUD ITI DAYTOY A MENSAHE

Ibinglay ni Presidente Monson dagiti nabileg nga adalen a nasursurona manipud kadagiti propeta a

sinarunona. Ipalagipna pay kadatayo nga “agibaon ti Mangisalakán kadagiti propeta gapu ta ay-ayatennatayo.” Iti panagserbiyo kadagiti sursuruanyo, mabalinyo nga ilawlawag no kasano a tanda ti ayat ti Dios kadatayo dagiti propeta ken apostol. Ibinglayyo ti balakad manipud iti maysa kadagiti bitla ni Presidente Monson iti napalabas a sapsap a komperensia. Awisenyo dagiti sursuruanyo nga agsagana para iti sapsap a komperensia babaen ti panangsublida a panangadal kadagiti bitla a nangnangruna a nakaparegta kadakuada ken nakatulung kadakuada a nakarikna iti ayat ti Mangisalakán.

AGTUTUBO

Agyamankami, O Dios, iti Propeta

Kasano nga inimpluensiannakayo ti propetatayo ka ni President Thomas S. Monson? Ania ti kangrunaan a malagipmo maipapan kenkuana? Isuratyo iti journalyo maipapan ken Presidente Monson ken ti biagna—iti adu kas iti panangiladawanna itoy a mensahe ti impluensia ti tunggal propeta a nalagipna.

Mabalinyo met ti pumili iti paggugusto nga adaw wenna quote manipud kenkuana ket isuratyo daytoy iti lugar a masansan a makitayo, kas iti school binder wenna iti siledyo. Mabalinyo pay ti agaramid iti picture quote ket aramidnyo a background ti selfonyo! Tunggal makitayo ti quote, mapanunotyo ti kinapateg ti sibibiag a propeta ken laglagipenyong nga adda isuna ditoy tapno ayaten ken tarabayennatayo.

Mabalinyo nga i-download ti musika “We Thank Thee, O God, for a Prophet” at [lds.org/go/9176](https://www.lds.org/go/9176).

ANNAK

Iwanwandatayo dagiti Propeta ken ni Cristo

Ikkannatayo ti Mangisalakán kadagiti propeta gapu ta ay-ayatennatayo. Ti panangsurrot kadagiti propeta makatulung kadatayo nga agpili iti umno. Ania ti dua a banag a maaramidyo tapno sumurot it propeta?



Pammati Pamilia Tulong

Sangsangkamaysa iti Puso

Nainkararagan nga adalenyo daytoy a material ken kalikagumanyo ti inspirasion tapno ammuen no ania ti ibinglayyo. Kasano a ti pannakaawattayo iti panggep ti Relief Society ket mangisagananto kadagiti annak a babbai ti Dios para kadagiti bendision ti agnanayon a biag?

Ket ninaganan ti Apo dagiti taona iti Zion, gapu ta sangsangkamaysa ti puso ken panunotda, ken nagtaengda iti kinalinteg; ket awan ti nakurapay kadakuada” (Moises 7:18). Kasano nga agkaykaysatayo?

Kinuna ni Elder M. Russell Ballard ti Korum dagiti Sangapulo-ket-dua nga: “Iti tengnga ti balikas nga English *atonement* ket ti balikas a *one*. No maawatan ti amin a sangkatawan daytoy, awan koma pulos ti asino ti pannakaseknantayo, ania man ti edad, maris ti kudil, katatao, relihion, wenno kasasaad iti kagimongan wenno ekonomia. Ikarigatantayo koma a tuladen ti Mangisalakan ken ditayo koma agbalin a natangsit, napalanguad, wenno saan a naasi kadagiti dadduma”¹

Insuro ni Presidente Henry B. Eyring, Umuna a Mammagbaga iti Umuna a Panguluen: “No adda kadagiti tao [ti] Espiritu kadakuada, [isuda] manamnamada ti panagtutunos. . . . Ti Espiritu ti Dios ket saan a mangparnuay iti pannakisuppiat (kitaen iti 3 Nephi 11:29). . . . Daytoy

ti mangiturong iti bukod a talna ken rikna ti pannakikaysa iti dadduma.”²

No maipanggep kadagiti pannubok ti pamilia, kinuna ni Carole M. Stephens, a nagserbi kas Umuna a mammagbaga iti Sapasap a Pangu-luen ti Relief Society: “Diak pay pulos napadasan ti nagbiag iti baet ti diborsio, ti saem ken awan talged a gapu ti pannakabaybay-an, wenno ti responsibilidad ti panagbalin nga agmaymaysa nga ina. Diak pay pulos napadasan ti namatayan iti maysa nga anak, saan a nakaanak, wenno panaggusto iti kapada iti katataona. Diak pay napadasan ti agibtur iti panagabusos, makapatay a sakit, wenno pannakairuam. Saan a dagitoy dagiti panagpatibker a gundaway kaniak.

“. . . Ngem babaen dagiti *bukod-ko* a pannubok . . . naam-ammok a nasayaat ti Maysa a mannakaawat. . . . Ken maysa pay, napadasak ti amin a mortal a pannubok a kadakdamatko babaen ti lente ti maysa nga anak a babai, ina, lelang, kabsat a babai, ikit, ken gayyem.

“Ti gundawaytayo kas annak a babbai ti Dios nga agtungtungpal iti katulagan ket saan laeng a pannakasursuro manipud kadagiti bukodtayo a pannubok; daytoy ti mamagkaykaysa iti panagrikna ken panangngaasi bayat ti panangtulongtayo iti dadduma pay a miembro ti pamilia ti Dios kadagiti panagkarigatanda.”³

Dagiti Mainayon a Nasantuan a Kasuratan ken Impormasion

Juan 17:20–23; Taga-Efeso 4:15; Mosiah 18:21–22; 4 Nephi 1:15
reliefsociety.lds.org

DAGITI NAGADAWAN

1. M. Russell Ballard, “The Atonement and the Value of One Soul,” *Liahona*, Mayo 2004, 86.
2. Henry B. Eyring, “That We May Be One,” *Ensign*, Mayo 1998, 67.
3. Carole M. Stephens, “The Family Is of God,” *Liahona*, Mayo 2015, 11–12.

Ibilang Daytoy

Kasano a makatulong ti pannakikaysatayo iti tunggal maysa iti pannakikaysatayo iti Dios?